

Ka Shithi Kaba Nyngkong U Apostol Petros

1 ¹Ka jingkhublei na u Petros, u apostol jong U Jisu Khrist.

Ha u paitlang ba la jied jong U Blei kiba don sha jngai na la ki jong ki iing ki sem, ia kiba la pynsakma kylleng ki phang jong ka Pontos, Galatia, Kappadokia, Asia bad Bithynia. ²U Blei kat kum ka jingthmu lypa jong u, u la pynlong ia phi u paitlang bakhuid jong u da ka jingtrei U Mynsiem bad u da mon ba phin kohnguh ia u bad ban ioh pynkhuid da ka snam U Jisu Khrist.

Nga duwai ba phin nang iai roi ha ka jingaiei bad ka jingsuk U Blei.

Ka Jingkyrmen Kaba Im

³Ka jingnguh ia U Blei uba U Kpa bad U Jisu Khrist uba U Trai jong ngi, uba kat kum ka jingkyrnei ka jingisynei jong u, u la pynkha thymmai ia ngi sha ka jingkyrmen kaba im da ka jingmihpat U Jisu Khrist na kiba ia. ⁴Mynta ngi ap ban iohpdang ia ki jingiohkynti ki bym pyut shuh, ki bym jot shuh lymne sep noh, kiba U Blei u la buh tyngkai ha bneng na ka bynta ki khun jong u.

⁵Ia kiba la sumar da bor U Blei lyngba ka jinggeit haduh kata ka jingpynim ia phi ia kaba la khreh ban ai ha phi ha kaba kut jong ki ia. ⁶Nga tip ba ka pynkmen haba pyrkat shaphang kata, wat la ka dei ba phin shah ia ki jingtynjuh ba bunjait mynta shipor. ⁷Kine ki jingtynjuh ki pynshisha ia ka jingngeit basngur jong phi kaba kham kor ban ia ka ksiar banylla ka ban sa jot noh ba la phrang ha ka ding. Te ka jingmih nangta kan long ka jingiaroh, ka burom bad ka jingpyndon burom ynda haba U Jisu Khrist un wan.

⁸Phim pat iohi ia U Khrist, hynrei la katta ruh phi iei ia u. Phim iohi ia u mynta, hynrei phi ngeit ha u. La pyndap ia phi da ka jingkmien baphylla jong ka bneng ka bym lah ban batai. ⁹Namar phi la kynjoh sha ka thong jong ka jingngeit, kaba long keiñ ka jingpynim ia ki mynsiem jong phi.

¹⁰Ki nongiathuhlypa ki la wad bniah bha bad ki la pyrshang ban sngewthuh shaphang kane ka jingpynim. Ki la kren shaphang kata ka jingaiei kaba la wan sha phi. ¹¹U Mynsiem jong U Khrist uba

la don ha kito ki nongiathuhlypa u da iaathuh shaphang ki jingjynjar ki ban sa jia ha U Khrist bad shaphang ka burom ka ban sa wan hadien kita ki jingjynjar. Ki la pyrshang ruh ban sngewthuh shaphang kita kiba la pynpaw sha ki da U Mynsiem, lano kata kan jia bad kaba kumno ka pyrthei kan long ha kata ka por.

¹²Ha ki la pynshai kdar ba ka jingshakri jong ki kam dei na ka bynta jong ki hi, ki la shakri ia phi keiñ haba ki la iaathuh shaphang kiei kiei ia kiba phi la iohsngew mynta na kita kiba la ialap ia ka Gospel da ka jingaibor U Mynsiem Bakhuid ia uba la phah na bneng. Wat ki angel ki kwah eh dik dik ban tip shaphang kine kiei kiei kiba la ialap sha phi.

Ka Jingkhot Sha Ka Jingim Kaba Khuid

¹³Kumta to pynleit jingmut na ka bynta ka jingshakri da kaba khan adkar bad to iai kyrmen ha ka jingaiei ia kaba yn wallam ha phi ha kata ka jingpynpaw ia U Jisu Khrist. ¹⁴Mynshuwa phim don ia ka jingshemphang kumba phi don mynta, kumta phi ia id katba kum ka jingkwah brai jong phi hi, hynrei mynta phi long ki khun U Blei, kumta to kohnguh ia u bad wat im shuh kumba mynshuwa. ¹⁵Kumba uta uba la khot ia phi u long uba khuid, kumta to long ma phi ruh kiba khuid ha ka jinglong jingim baroh. ¹⁶Ha ki jingthoh Bakhuid U Blei u ong, "To long phi kiba khuid, namar nga long uba khuid."

¹⁷Phi duwai sha U Blei bad phi khot Kpa ia u, hynrei un bishar kumjuh ia baroh khlem niew shiliang khmat kat kum ki jingleh jong ki. Kumta katba phi dangsah hangne ha pyrthei, to phin im da ka jingsheptieng burom ia U Blei. ¹⁸Phi tip ba ka jingim jong phi ha ki por ba la leit noh ka long kaba thala. Phi la pyrthuhbud ia ka rukom im jong kito kiba la im ha shuwa jong phi. Hynrei la pynim ia phi na kaba kum kata ka jinglong jingim. La siewspah ia phi, ym da kiei kiei ki ba sep noh kum ka ksiar lane ka rupa, ¹⁹hynrei da ka snam bakordor U Khrist, uba long u langkña bakyntang bad bajanai tam.

²⁰Īa uba la jied naduh shuwa ban pynlong ĩa ka pyrthei, hynrei la pynpaw ĩa u ha kine ki ĩa bakhatduh na ka bynta jong phi.

²¹Lyngba U Khrist phi ngeit ha U Blei, uba la pynmihpat ĩa u na kiba ĩap bad uba la pyndonburom ĩa u. Kumta ka jingngeit bad ka jingkyrmen jong phi ki long ha U Blei.

²²Mynta phi la pynkhuid ĩalade da kaba kohnguh ĩa ka jingshisha ha ka jingieid basngur ĩa la ki para, kumta to phin ĩa ĩeid shithrem paralok hi naduh ka dohnud. ²³La kha pat ĩa phi sha ka jingim ba thymmai ym na u symbai basep hynrei u symbai bymsep da ka ktien ba im U Blei kaba ĩaisah bymjukut. ²⁴Ka Jingthoh Bakhuid ka ong,

“Ka jingim jong ngi ka long kum u
phlang
bad ka burom jong ka tang kum ka
jingtynnad u syntiew.
U phlang u tyrkhong
bad u syntiew u tlor noh.

²⁵Hynrei ka ktien U Trai ka ĩaisah
bymjukut.” *Isaiah 40:6-8*

Bad kata ka ktien ka dei ka Gospel kaba la ĩalap sha phi.

U Maw Baim Bad Ka Jaitbynriew Bakhuid

2 ¹Naba kumta, to sangeh noh na kaba kren pynmong ĩa kiwei, na kaba lamler lane shukor. Wat long ruh kiba pihuiñ ne kren sniew ĩa kiwei. ²Kum ki khunlung ba dang kha kiba thngan ĩa ka dud, to phin thrang ĩa ki jinghikai basngur ki ban bsa ĩa ka mynsiem jong phi khnang ba phin lah ban san sha ka jingpynim. ³Haba mynta phi la mad ĩa ka jingbha jong U Trai.

⁴U Trai Jisu u long u maw ba im ĩa uba la kyntait da ki briew, hynrei ĩa une keiñ U Blei u la jied bad u long uba kongsan. Kumta to wan sha u. ⁵Phi ruh phi long kum ki maw ba im kiba U Blei u la jied ban tei ĩa ka ĩing ba kynja mynsiem ba phin shakri ĩa u kum ki lyngdoh bakhuid da kaba kyntiew ĩa ki jingknia ba kynja mynsiem kiba pdiang hun ha U Blei da U Jisu Khrist. ⁶Ka Jingthoh Bakhuid ka ong,

“Hakhmih, nga la jied ĩa u mawdong
uba kongsan,
bad nga la buh ĩa uta u maw ha
Seion.

Uno uno uba shaniah ha u yn ym
pynlehraiñ lano lano ruh.”

Isaiah 28:16

⁷Kumta, uta u maw u long ka burom na ka bynta jong phi ki bangeit, hynrei ĩa kito ki bymngait u long

“u maw ĩa uba ki nongtei ki la kyntait
noh,
uba kylla long u maw ba kongsan.”

Salim 118:22

⁸Īa kita u long ruh

“u maw ba ki briew ki jynthut,
u mawsiang ka jingpynkyllon.”

Isaiah 8:14

Ki jynthut namar ba kim shym kohnguh ĩa ka ktien U Blei, kane kaba U Blei u la thmu ba kan jia ha kita ki briew.

⁹Hynrei phi, phi long u paitlang ba la jied, ki lyngdoh ba kynja syiem, ka jaitbynriew bakhuid, u paitlang jong U Blei ba la khot ban pynbna ĩa kiei kiei kiba phylla kiba u la leh. Uba la sei ruh ĩa phi na ka jingdum jong ka pop sha ka jingshai baphylla jong u.

¹⁰ Mynshuwa phim long u paitlang
bakyrpang,
hynrei mynta phi long u paitlang
jong U Blei.

Mynno mynno phim shym la pdiang
ĩa ka jingsynei,
hynrei mynta U Blei u la leh isynei
ĩa phi.

To Im Na Ka Bynta U Blei

¹¹Ko para baieid, phi long kum ki nongwanjngoh kai bad ki nongwei hangne ha pyrthei. Kumta nga kyrpad ĩa phi ban pyllait ĩalade na kino kino ki jingkwah jakhlia kiba ĩaleh pyrshah ĩa ka mynsiem jong phi. ¹²La ker sawdong ĩa phi da ki briew ki bymngait, kiba lah ban kynnoh sniew ĩa phi kum ki nongleh bymdei. Kumta to im ka jingim kaba bha khnang ba kin iohi ĩa ki jingleh babha jong phi bad kin pyndonburom ĩa U Blei ha kata ka sngi ka jingwani jong u.

To Kohnguh ĩa Ki Bor Kiba Halor

¹³To long la kloï ban pynkohnguh ĩalade ha ki nongsynshar ha kane ka pyrthei na ka bynta U Trai, la ha u syiem ne ha ki bor ba halor. ¹⁴To kohnguh ruh ĩa kita ki nongialam ba la phah da u syiem, namar la phah ĩa ki ban pynshitom ĩa kita kiba leh bakla bad ban ĩaroh ĩa kita kiba leh babha. ¹⁵Kane ka long ka mon U Blei ba da kaba phi ĩai leh ĩa kaba bha, phi set noh

ia ka shyntur jong kita kiba kren bymdei shaphang jong phi ha ka jingbymtip. ¹⁶To im kum ki briew kiba laitluid, khlem da ailad pat ba kata ka jinglaitluid jong phi kan long ka daw ba phin leh bymman, hynrei to im kum kiba shakri ia U Blei. ¹⁷To phin niiewburom ia ki briew baroh. To ieid ia ki para kiba ha ka longiing jong U Blei. To sheptieng ia U Blei bad niiewburom ia u syiem.

Ka Nuksa Na Ka Jingshah Shitom U Khrist

¹⁸Ki mraw, to shakri mon sngewbha ia la ki jong ki kynrad da ka jingsheptieng burom baroh, ym tang ia ki kynrad ki babha bad kiba sbun hynrei to kohnguh ruh wat ia kita ki kynrad kiba dukhi. ¹⁹Lah ban don na phi ki ban shah shitom wat haba phi khlem leh bakla ei ei, hynrei na ka bynta ka jingiatiplem sha U Blei kata ka jingshah shitom jong phi ka pynsngewbha ia u. ²⁰Hynrei lada phi shah shitom namar ba phi leh bymdei, ym don daw ei ei ban iaroh ia phi ha kata. Lada la pynshitom namar ba phi leh bha bad phi iaishah, kata keiñ ka pynsngewbha ia U Blei. ²¹Namar sha kane keiñ la khot ia phi, naba U Khrist ruh u la shah na ka bynta jong ngi khnang ba ngin ioh bud ia ka nuksa kaba u la leh.

²²“U bym shym la leh pop
lymne ym don kaba shukor ha ka
shyntur jong u.” *Isaiah 53:9*

²³Ki briew ki kren bein ia u, hynrei um ju kren bein kylliang ia ki. U shah shitom, hynrei um ju byrngem iano iano ruh, pynban u aiti ialade ha U Blei uba bishar hok. ²⁴U Khrist dalade hi u la bah noh ia ki pop jong ngi ha ka met jong u halor kata ka diengphna, khnang haba la iap noh sha kita ki pop ngin ioh im sha ka hok bad uba da ki jingjngemsnam jong u la pynkhiah ia phi. ²⁵Phi long kum ka langbrot kaba la ia id sakma na la ka lynti, hynrei mynta phi la wan phai sha u Nongaplangbrot bad u Nongsharai ka mynsiem jong phi.

Ka Tnga Bad U Tnga

3 ¹Ha kajuha ka rukom, phi ki kynthei to pynkohnguh mon sngewbha ha la ki jong ki tnga, ba kumta kita kiba kyntait ban ngeit ia ka ktien U Blei yn ioh pynngeit ia ki da ka jinglong jingim jong phi wat khlem da kren ei ei ²“Haba kin khmih ia ka jingim basngur bad ba sheptieng riewblei jong phi. ³Ai ba ka jingpynitynnad jong phi

kan ym long tang da ki jingthain shniuh, ki jingdeng ksar, ne ki riam babha, ⁴hynrei da ka jinglong babha, ka jingjemnud bad ka mynsiem ba jarjar kaba mih napoh ka dohnud jong phi. Kata keiñ ka jingitynnad kan ym jah noh bad ka long kaba kordor eh hakhmat U Blei.

⁵Ka la long kumjuh bad ki kynthei ba riewblei mynhyndai kiba ju bud ia U Blei, ki pynitynnad ialade ha kata ka rukom da kaba pynkohnguh mon sngewbha ha la ki jong ki tnga. ⁶Kumba ka Sara ka la pynkohnguh ha u Abraham uba long u tnga jong ka da kaba khot kynrad ia u, kumta phi ki kynthei phi long ki khun bashisha jong ka Sara lada phi iai leh ia kaba dei khlem jingsheptieng.

⁷Phi ki shynrang ruh, to ia shongsuk bad la ki jong ki tnga. To ai burom ia ki kum ki khiew ba kham tlot ban ia phi, namar U Blei u la ai ha ki ruh ia kajuha ka jingkyrkhu jong ka jingim ba thymmai, khnang ban ym pynpep noh ia ki jingduwai jong phi.

Ka Jingshah Shitom Na Ka Bynta Ka Hok

⁸Kumta phi baroh to ia im lang ha ka jingsuk, kiba iamut ia kajuha, kiba iaieid kum shipara, kiba sbun bad kiba sngewrit. ⁹Wat ia leh markylliang ia kaba sniew namar kaba sniew lane wat krenbein ia kita kiba krenbein ia phi, hynrei kyrkhu ia ki namar ia phi ruh la khot ban iohpdang ia ki jingkyrkhu. ¹⁰Ka jingthoh Bakhuid ka ong,

“Lada phi kwah ban ioh ia ka jingim
kaba kmen

bad ban iohi ia ki sngi babha,
to khang noh na ki jingkren kiba
sniew

bad wat ai ba ka kyntien shukor
kan mih na ka shyntur jong phi.

¹¹ Sangeh noh na kaba leh sniew, hynrei
to leh ia kaba bha.

Wad ia ka jingsuk bad beh brai ia ka.

¹² U Trai u khmih kmang ia kiba hok
bad u shahshkor ia ki jingduwai
jong ki,

hynrei u long pyrshah ia kito kiba leh
bymman.” *Salm 34:12-16*

¹³Lada phi iai pynmlien ban leh babha, ym don uno uno ruh u ban pynsniew ia phi. ¹⁴Hynrei lada phi shah shitom ha kaba leh babha suk ma phi. “Wat sheptieng ia ki briew kiba pynsheptieng ia phi lymne wat sngew khuslai.” ¹⁵Hynrei to

pyndonburom ia U Khrist kum U Trai ha ki dohnud jong phi. Borabor to long kiba la kloï ban ai jubab ia kita kiba pan na phi ia ka jingpynshai shaphang ka jingkyrmen kaba phi don. ¹⁶Hynrei to leh ia kata da ka jingjemnud bad da kaba burom, da kaba sumar ia ka jingiatiplem basngur jong phi khnang ba yn ioh pynlehraïñ ia kita kiba kren sniew ia phi haba kin iohi ia ka jingim babha jong phi kum ki nongbud jong U Khrist.

¹⁷Khamlah kaba shah shitom namar ka jinglehbha ban ia kaba leh sniew. Hooïd, kan long kaba bha keiñ lada ka long kat kum ka mon U Blei.

¹⁸ U Khrist ruh u la shah shitom mynba u la iap na ka bynta jong phi, bad da kata ka jingiap ba shisien, u la siewspah ia ki pop jong phi. U long uba khlem jingrem, hynrei u la iap na ka bynta kiba la rem. U la leh ia kane ban wallam ia phi sha U Blei. La pyniap ia u ha ka doh, hynrei la pynlong im ia u da U Mynsiem.

¹⁹Bad da U Mynsiem u la leit ban ialap ha kita ki mynsiem ha ka byndi, ²⁰ki bym shym la ngeit ha ki sngi jong u Noah, mynba U Blei u la iaishah slem bad ki haba u Noah u dang thaw ia ka iinglieng bakhraw ha kaba tang phra ngut ki mynsiem ki la lait im na kata ka jingshlei um. ²¹Bad kata ka um ka long ka dur jong ka jingpynbaptis kaba pynim ia phi mynta da ka jingpynmihpat ia U Jisu Khrist na kiba iap. Ka jingpynbaptis kam dei ka jingsait noh ia ka jingtngit jong ka doh hynrei ka jingwad ia ka jingiatiplem babha jong phi sha U Blei. ²²Mynta U Khrist u la leit sha bneng bad u shong ha ka liang kamon U Blei, u da synshar halor ki angel, ki iktiar bad ki bor.

Ka Jingim Ba La Pynkylla

4 ¹Kumba U Khrist u la shah shitom ha ka doh, kumta phi ruh to pynkhlaïñ ialade ha kajuha ka rukom pyrkhata kum U Khrist, namar kita kiba shah shitom ha ka doh ki la wai noh na ka pop, ²khngang ba ha ki sngi ba dang sah jong ka jingim jong phi hangne ha pyrthei phin ioh ban pyndep ia ka mon U Blei, te ym ia ki jingkwah brai jong ka doh. ³Mynshuwa phi la pynsepei kai ia ka por ban leh kumba leh kito ki

briew ki bymtip ia U Blei. Phi la im ha ki jingkwah brai, ha ki jingleh bymman, kiba kyrni ha ki jingdih, ha ki jingsngewbha ba thala bad ki jinglehsang ha ki jingmane bleithaw.

⁴Mynta kito ki briew ki pyrkhata lyngngoh ba phim iasoh shuh bad ki ha ki kam bieit bym myntoi jong ki bad kumta ki kren sniew shaphang jong phi. ⁵Hynrei kin hap ban ai jingkheïñ hakhmat U Blei ia kaei kaba ki la leh. Dei ma u, u ban sa bishar shen ia uwei-pa-uwei, ia kiba im bad kiba iap. ⁶Namar na ka bynta kane la ialap ia ka Gospel ha kita kiba la iap mynta, ba wat la ki la dei ban iap noh kum kiwei pat ki briew ha ka doh, hynrei la pynlong im ia ki sha U Blei ha U Mynsiem.

Ki Sordar Babha Ka Jingaiei U Blei

⁷Ka por jong ka jingkut ia kiei kiei baroh ka la jan. Kumta to phin khan adkar ia la ki jingmut bad sharai bha ialade ha ki jingduwai. ⁸Kaba kongsan eh ka long ban iaieid markylliang, namar ka jingieid ka pynlah ia phi ban mab noh ia kiba bun byllien ki pop. ⁹To long kiba kloï ban pdiang sngewbha ia kiwei ha iing jong phi khlem kano kano ka jingkhñium. ¹⁰U Blei u la sam ia ka jingai jong u ha ki rukom kiba pher. Kumta to long phi ki sordar babha ban pyntrei ia kita ki jingai ha kaba leh babha ia kiwei. ¹¹Lada phi don ka jingai ban kren, to ai ba kita ki jingkren kin long kumba na U Blei. Lada phi don ia ka jingai ban shakri, to leh kumta da ka bor kaba U Blei u la ai. Te yn pyndonburom ia U Blei ha kiei kiei baroh lyngba U Jisu Khrist ha uba to long ka bor bad ka burom shadah ki bymjukut ki bymjukut. Amen.

Kaba Shah Shitom Kum U Nongbud U Khrist

¹²Ko para, wat sngewphylla ia kita ki jingshitom kiba phi shah mynta kiba tynjuh ia ka jingngeit jong phi, wat nïew ba kata ka dei kaba wan jia khyllah ha phi. ¹³Hynrei to sngewkmen phi ba phi iohbynta lang na ki jingshah shitom U Khrist, namar haba yn pynpaw noh ia U Khrist ha ka burom yn sa pyndap ia phi da ka jingkmen kaba khraw eh. ¹⁴Haba ki briew ki kren sniew ia phi namar ba phi bud ia U Khrist, suk ma phi keiñ, namar U Mynsiem U Blei bad U Mynsiem ka burom u long lem bad phi. Ha ki shisha la kren beïñ ia u, hynrei ha ngi la pyndonburom. ¹⁵Wat ai ba phin shah shitom kum u nongpyniap briew, lane ba phi tuh, phi

thaw jingkulmar lane phi pyrshang ban mushlia ia ka jingim jong ki briew. ¹⁶Hynrei lada phi shah shitom kum ki nongbud U Khrist, to wat sngew lehraiñ, pynban to ainguh ia U Blei namar kata ka kyrteng. ¹⁷Naba ka la dei ka ia ba ka jingbishar kan sdang na ka longiing jong U Blei. Lada ka sdang na ngi, te kaei ka ban jia ia kito ki bym shym la kohnguh ia ka Gospel U Blei?

¹⁸ “Kumta lada ka long kaba eh ba uba hok un iohlait im, te katno tam ia u nongpop uba ialeh pyrshah ia U Blei?”

Proberb 11:31

¹⁹Namar kata kita kiba shah shitom katba kum ka mon U Blei ha kaba leh babha, ki dei ban aiti lut ia la ka jingim ha la U Nongthaw uba ki lah ban shaniah.

Ka Kynhun Jong U Blei

5 ¹Mynta nga don ban ong ei ei ia ki basan ha ka kynhun ha uba nga ruh nga long u basan. Nga la sakhi ia ki jingshah shitom U Khrist bad ngan sa iohbynta lang ha ka burom ka ban sa pynpaw. ²Nga kyrpad ia phi ba phin sharai bha ia ka kynhun langbrot U Blei kaba phi la shim ia ka jingkitkhlieh da la ka mon sngewbha, te ym da ka jingpynbor. To shakri ia ki da ka jingkmeh, te ym da ka jingkmeh lynti ban ioh bainong. ³Ym kiba leh trai khlieh halor kata ka kynhun, hynrei ban pyni ka nuksa babha sha ki. ⁴Ynda U Khrist U Kynrad jong ki langbrot un wan, phin sa ioh ia ka pansngiat ka burom ka bym sep noh.

⁵Kumjuh phi ki samla, to pynkohnguh ialade ha kiba la kham san, to kup ruh ia ka jingsngewrit ha ka jingiadei bad kiwei.

“Naba U Blei u ialeh pyrshah ia kiba sarong, hynrei u ai ka jingaiei ia kiba sngewrit.”

Proberb 3:34

⁶Kumta to pynrit ialade ha ki kti badonbor U Blei, te un sa kyntiew ia phi ha ka ia kaba biang. ⁷Bret noh ia baroh ki jingkluslai jong phi ha u, namar ba u sumar sukher ma u shaphang jong phi.

⁸To phin leh adkar bad sharai bha ialade! Namar u Soitan uba long u nongshun jong phi, u iaid kylleng kum u sing ba kyrhuh u da wad khnang iano iano ba un ioh nguid tylli. ⁹Ia u to phin ialeh pyrshah, da kaba ieng skhem ha ka jingngeit, haba phi tip ba ki para jong phi ruh ha kylleng ka pyrthei ki shah shitom ia kijuh ki jingjynjar kum ma phi hi.

¹⁰Hynrei U Blei jong ka jingaiei uba la khot ia phi sha ka burom ba bymjukut ha U Khrist Jisu, haba phi la shah shitom shipor ma u hi un pynjanai, pynskhem bad pynshaitbor ia phi. ¹¹Ha u to long ka jingsynshar sha ki bymjukut ki bymjukut. Amen.

Ki Jingkhublei Khatduh

¹²U Silas uba long u para ba iaineh ha U Khrist un wanrah ia kane ka shithi sha phi. Nga la thoh ia kane ka shithi ba lyngkot khnang ban ai mynsiem ia phi bad iathuh ha phi ba kane ka dei ka jingaiei bashisha jong U Blei. To ieng skhem ha kata ka jingaiei.

¹³Ka balang ha Babilon ia kaba la jied lem bad phi ka ai khublei ia phi. U Markos u khun jong nga ha U Khrist, u ruh u ai khublei ia phi. ¹⁴To khublei da ka jingieid bakyrpang ia baroh kiba phi iakynduh.

Ka jingsuk sha phi baroh kiba long ha U Khrist.